



UPA 2017/011-01

01-06-2017

Nunatta Karsiata 2016-imut naatsorsuutaasa Inatsisartunit akuerineqarnissaat pillugu Inatsisartut aalajangiiffigisassaattut siunnersuut.

(Aningaasaqarnermut Akileraartarnermullu Naalakkersuisoq)

Nunatta Karsiata 2016-imut naatsorsuutaasa Inatsisartunit akuerineqarnissaat pillugu Inatsisartut aalajangiiffigisassaattut siunnersuut Partii Naleraq sinnerlugu imannak oqaaseqarfigissuarput:

Siullermik Partii Naleqqamiit nuannaarutigalugu maluginiarparput nunatta karsia 2016-imi naatsorsuutitigut ajunngitsumik angusaqarmat, ilaatigut aalisartut aalisarluarnerisa aammalu aalisakkat avamammut tunineqartut akigissaartinneqarnerat pissutaaqataaqataallutik.

Soorunami aalisarnek inuussutissarsiutit pingaarnersaat ingerlalluartillugu aamma tamanna nunami sulisitsinernut inuussutissarsiutinullu allanut ajunngitsumik sunniuttarnerata takuteqqippaa aamma suliffissaaleqisut ikileriarsimasut, tamannalu aamma ajunngitsutut nalilerusupparput.

Aamma iluanaaruteqarneruneq ilaatigut Namminersorlutik Oqartuussat Ingerlatseqatigiiffiutaanniit akileraarutitigut naatsorsuutigisamiit 73 mio kr-ingajannik iserteqarnerunermik pissuteqarpoq.

Aamma nioqqutissanik eqqussuinermi akitsuutikkut naatsorsuutigisamiit 26,5 mio-inik isertitsinerusoqarsimavoq.

Taamaakkaluartoq soorunami aamma iluarsiniagassaqaartuaannartoq anguniagassanillu tamakkiisumik angusaqarniarnermi unammillernartut arlaqarsinnaasartut nalunngilarput.

Tassunga atatillugu paaserusunnartut ilagaat, EU-mi ilinniartitaanermut tunngatillugu isumaqatigiissutip tamakkiisumik naammassineqartanninneranut suut imaluunniit suna pissutaanersoq paaserusunnarpoq, tassami 2016 anguniagassani naammassineqarsimasut taamaallaat 68 %-iusimammata ?

Ajoraluartumilli aningaasaqarneq ajunngitsumik ineriartorfiugaluartoq akiitsorineqartut tamarmik januar 2016-imiit januar 2017-imut 6,9 %-imik qaffiarfiu7simappat, tassa 875 mio kr-iniit 935 mio kr-inut.

2016-imi aamma Pituffimmi kiffartuussinissamut isumaqatigiissutikkut aningaasarpasuit annaaneqartut pillugit naalakkersuinikkut annerusumik iliuseqartoqaqqinnissaa piumasaraarput.

Aamma malunginiarparput Nukissiorfiit 23,5 mio kr-inik amingartooruteqartut, taamaakkaluartoq 10,1 mio kr-init sulisut akissarsiaannik kukkusumik ingerlatsisimaneq pissutigalugu aningaasaliisoqartariaqarsimavoq.

Aningaasarsiatigut kukkuneq taama annertutigisoq akueriuminaattoq ersarinnerusumik Naalakkersuisut nassuiaateqarfigisariaqaraat piumasaraarput.

2016-imi Pituffik pillugu isumaqatigiissutit annaanerata kinguneranik aningaasarpasuit annaaneqarput, taamaattumik politikikkut qanoq iliuseqaaqqittoqarnissaa piumasaraarput.

Kukkunersuisut ilaatigut takutippaat, kukkunerusinnaasut aamma amingaataasinnaasut pillugit aaqqissuussamik aamma uppernarsaatitalimmik sulinerup ingerlanneqarnera annikitsuinnarmik ingerlanneqartoq.

Aamma malitseqartitsinernik aaqqissuussanik nakkutilliinermik suliat pillugit aaliangersakkat killilimmik ingerlanneqartut.

Taamaammat kukkunersuisut nalunaarusiaminni inassutingaat, ERP-imik aqutsissummik atuutsitsilernerumut pisussamut atatillugu, aarlerinaataasinnaasunik naliliinermik suliaq sakkortusineqarssasoq, soorlu nakkutilliinermik iliuitsit ilusilersorneqarneranni aamma atuutsinneqarneranni, minnerunngitsumik malitseqartitsinermi takkuninnga suliat naammassineqarsinnaaqqullugit.

Akissarsiat naatsorsuutinut nalunaarsoriikkanut naligiissaarneqartarnerannut tunngatillugu kukkunersuisut ilaatigut nalunaarummini allapput, akissarsiat katinnerat ukiumoortumik naligiissaarneqartartut. Taamaammallu kukkunersuisut naliliipput, qaammatit tamaasa naligiissarinermik ingerlatsisoqartassangaluartoq, nakkutilliineq pitsaasumik sunniuteqassappat, tamannalu malinneqartariaqarpoq.

Akiitsullit nalikilliliiffigineqarnerannik piumasaqaatip arlalitsigut qitiusumiit naammassineqarsimanginneri maliginiarneqarsimapput, tassa akiitsullit arlallit katillugit 7,2 mio-

ningajannik nalillit, qaammatit arfinillit sinnerlugit akiliisitsiniartarfimmut ingerlanneqarsimangitsut, taamaammallu kukkunersiuisut inassutigaat malittarisassat naliginnaasut malinneqassasut.

Kukkunersiuisut paasisimavaat nalilinnik iluarsiiinerit 133 mio kr-inik nalillit iluarsiivigineqarsimasut, Nukissiorfiit ukiut siuliini sanaartornermut aningaasaliissutinik ikinnerusunik atuisimanermut tunngasut, tassungalu tunngatillugu aamma paasineqarsimavoq oqimaatigiisitsinerit pillugit konto-mi politikkimik aamma akuersissuteqartarnermik ingerlatseriaatsimik aaliangersaasoqarsimangitsoq.

Aningaasaliissutaasunik nakkutilliinermi malittarisassanik sukaterinissaq suli pisariaqartinneqartoq kukkunersiuisut nalunaarutaanni aamma atuarneqarsinnaavoq, tassa tunngavilersuutini takuneqarsinnaasimangimmat suna pillugu nikingassutaasunut aningaasaliissutissanik qinnuteqartoqarsimanginnersoq.

Suliffeqarfiit namminerisamik ingerlasuni pisortallu pigisaanni pikkorissaanermi aningaasartuutit qanoq ingerlanersut kikkunnullu atorneqartarnersut soqutiginaatillit ilagingaat oqaatigissavarput.

Pequtinik nalunaarsuisarnermut malittarisassanik naleqqussaasoqarnissaa aamma uparuarneqarpoq.

Inuiaqatigiinni annertungaatsiartumik pikititsisoq siornamiit aallartittoq tassalu angallannermi kiffartuussinermi isumaqatigiisummut suliap sukumiisumik misissorneqartariaqarnera piumasarivarput. Aallqaammulli oqaatigineqartoq – ajorseriaateqassanngittoq, killormuuanit pisoqarnera nunarput tamakkerlugu eqquinerluppoq akuersarneqarsinnaanngittumik taamaattumik sukumiilluinnartumik misissuisoqarnissaa akisussaaffimmillu inissiisoqarnissaa inissittariaqarpoq siunissami taama annertutigisumik kukkusoqaaqqittoqassanngippat taama inuiaqatigiinnut akisutigisumik.

Taama oqaaseqarluta suliap appasaanneerneqannginnerani kukkunersiuiinermut ataatsimiititaliami suliarineqarnissaa inassutingaarput.